

Зоҳирига қараб ҳукм чиқармаслик



Зоҳирига қараб ҳукм чиқармаслик

11:00 / 21.08.2023 1494

Кичик бир қишлоқда тикувчи чол яшар экан. Лекин у қимматбаҳо ва чиройли кийимларни тикар ва яхшигина нархга сотар экан.

Кунлардан бир кун шу қишлоқда яшайдиган камбағал кишилардан бири келиб тикувчига дебди: Сиз касбингиз орқали яхшигина даромад топасиз, лекин нима учун бизга ўхшаган фақиру фуқароларга эҳсон қилмайсиз. Ана, қишлоғимиздаги қассобни кўринг, у ҳар ойда камбағаллар учун маълум миқдордаги гўштни текинга тарқатади. Шундан ўrnak олсангиз бўлмайдими?!-дебди. Тикувчи чол унга ҳеч нарса демай, жилмайибгина қўя қолибди.

Тикувчининг муомаласидан камбағал яна ҳам дарғазаб бўлиб чиқиб кетибди ва бутун қишлоққа тикувчини хасис ва зиқна деб ёмонлаб чиқибди. Унинг гапидан таъсиранган қишлоқ аҳлида тикувчига нисбатан нафрат пайдо бўлибди..

Бир қанча муддат ўтиб тикувчи қаттиқ бетоб бўлиб, ётиб қолибди. Ён атрофидаги ҳамсоялар ҳам унинг ҳолидан хабар олишмабди. Шу ётганича тикувчи қайтиб турмабди, вафот этибди.

Кунлар ўтиб қишлоқ камбағаллари қассоб ҳеч кимга гүшт бермай қўйганлиги пайқаб қолишибди. Бунинг сабабини сўраш учун қассобнинг олдига боришибди. Шунда қассоб: тикувчи чол ҳар ойда менга маълум миқдорда маблағ бериб, шунинг қийматида камбағалларга текинга гүшт тарқатишими айтар эди. Вафотидан кейин пул келиши тўхтаб қолди. Шунинг учун бундан буёғига сизларга текинга гүшт бера олмайман, дебди.

Қиссадан ҳисса шуки, одамларнинг зоҳирига қараб шошилинч хукм чиқарманг, сизга маълум бўлмаган баъзи бир ишлари бўладики, билганингиздан кейин эҳтимол у ҳақидаги фикрингиз бутунлай ўзгарар.

Қалблардаги нарсани фақат Угина билур.

Ушбу мақола Ўзбекистон Республикаси Вазирлар Маҳкамаси ҳузуридаги Дин ишлари бўйича қўмитанинг 2023 йил 16 июндаги 03-07/4775-рақамли хуносаси асосида тайёрланди.